


Kumtluang

BU NGANA



Pawl-V Mizo

THIAMNA LEH HMASAWNNA

Kum zariat lai kal taah khan Persia lal pakhat chuan China lal fanu hmêl tha tak mai chu nupaia neih a duh a. China lal fanu hnenah chuan a chhiahhlawhte a tir ta a. Persia ram aṭanga China thleng tur chuan kum hnih lai tuipuah kal a ngai a ni.



Persia lal mi tirhten China ram an thlena, an kal chhan an han sawi chuan China lal fanu chuan a lo duh ve mai a, Persia lal nei tur chuan a inpuahchah ta a. Mi sanghnih lai nen lawngin Persia ram chu an pan ta a. An zin kawng rapthlâk takah chuan mi zaruk lai an thi a. Chutih lai chuan Persia ram lal chu a thi a; a thih thu hre lo chuan China lal fanu chuan Persia ram chu a thleng ta a. Persia lal fapa chu a pa aiah a lo lal tawh a; tichuan lal fanu chuan Persia lal fapa chu pasalâh a nei ta zâwk a.

Tunah erawh chuan Persia ram aṭangin darkar ruk lekah China a thlawh thlen theih ta! Chu aia chak leh zâwk chu radio emaw, television emaw hmangin rang takin chanchin tharte kan hre thei ta zung zung mai. Inkhel hmuhnawm tak tak; entir nan, Brazil leh England Football khel lai mêkte pawh a hmuna awm ang maiin kan lo en thei ta reng mai! Science leh technology thiamnain hma a sawn nasat êm avangin tunah chuan khawvêl hmun hrang hrang awlsam zâwkin kan lo be thei ta. Thingtlâng kilkhâwr berah pawh iptea ah mai theih inbiak pawhna kan lo kawh ta fir fer mai a nih hi!

Tuna i lehkhahu chhiar lai ngei pawh kha science thiamna hmanga siam a ni a. Kan lehkhahu te, hun min hrilhtu sana te, kan thil ziahna pen te leh kan ni tin nuna thil ṭangkai, awlsam zâwka rawng kan bawh theihna thleng hian science thiamna hmanga kan neih a ni.

Heng thlawhtheihna te, radio te, kawlphehtha te leh damdawi lam hmu chhuaktute hi i ngaihtuah ve tawh ngai em? Heng hmu chhuaktute hian nasa taka an lo ngaihtuah leh an thawh rimna avangin heng thilte hi an hmu chhuak a ni. A nih leh eng vangin nge apple rah hi lei lama a lo tlâk kher? Kan awmna lei hian hipna a neih vang a ni. He thil hmu chhuaktu Sir Isaac Newton hi a thil hmuh chhuah ropui tak tak avangin ‘Tunlai Science Thiamna Pa’ tia vuah a ni.

Thlawhtheihna chak chi ‘Jet’ thlawhtheihna te hi a thlâwk chak êm êm a, ri aia chakin an thlâwk thei a ni. Entir nan: i thian chu hmun hla takah dintir la, i au rual chiahin jet thlawhtheihna chu i awmna ațangin i thianpa lam panin thlâwk chhuak ta sela i thianpain i au ri a hriat hmain jet thlawhtheihna chuan i thianpa awmna chu a thleng hman dawn a ni. Heng ai pawha la chak leh chu Boruak lawng (Space Craft) hi a ni. Boruak lawng hi scientist-te chuan van lam chanchin zir nân leh arsi dangte chanchin zir nân an hmang țangkai hle a. Kum 1969 khan Armstrong-a leh Aldrin-a te chu Boruak lawng hmang hian thlaah an han țum a. Heta țang hian van sâng chanchin chu nasa lehzualin khawvêlin an lo zir țan ta a ni.

Mi thenkhat chu boruak lawng hmangin intihhlîm nan van sângah an zin a. Nangni pawh in lo țang lian ang a, anmahni ang hian in la zin ve thei a ni.

TIH TURTE

1. Heng zawhnate hi chhâng rawh:

(a) Persia lal khan tu nge nupuia neih a duh?

(aw) Hmanlai khan Persia ram ațanga China thleng turin engtia rei nge thang ngai?

(b) Kan ni tin nuna thil pawimawh pali science thiamna avanga kan neihte ziaak rawh.

(ch) ‘Tunlai Science thiamna pa’ an tih kha tu nge ni?

(d) Jet thlawhtheihna aia chak zawk kha eng nge ni?

(e) Tute nge thlaa lawn hmasa berte kha?

2. Tunlaia inbiak pawh awlsam ta êm êm mai hi eng nge a chhan?

Tunlai huna awlsam taka inbiak pawhna hmanraw chi hnih ziaak rawh.

3. Heng hi tute hmuh chhuah nge?

(a) radio _____

(aw) television _____

(b) thlawhtheihna _____

(ch) fountain pen _____

4. Eng vangin nge apple rah hi lei lamah a tlak kher?

5. Heng thu hmang hian a kar awlah dah khat rawh:

science, Brazil, thiamna, entir nan, England, mi thiamte, television, inbiak

Tunlai chuan _____ in hma a sawn nasa tawh êm êm a, _____ i han chhuah a, _____ leh _____ inkhel hmuhdawm tak pawh a hmuna awm ang maiin in lo en thei ta. Hengte hi _____ thiamna vang a ni. _____ awlsam zawka kan _____ pawh zung zung theihna hi rim taka _____ thawhna rah a ni.

6. Heng hmang hian sentence siam rawh:

(a) awlsam

(aw) chanchin thar

(b) thlâwk

(ch) zung zung

(d) ʔangkai

7. Chhungkaw khawsakna lo danglam ta êm êm hi in zirtirtu hovin sawi khâwm ula, a chhan han ziaak teh u.

8. A hnuaia thute hi chhiar la, ʔawngkam dik lo awm apiang a dikin thlâk rawh.

i) Pawisa i nei ngah em?

ii) Ka tui in a hal.

iii) Ka muthilh a chhuak.

iv) Zingchaw ei a hun ta.

v) Nachinah motor an insu.

vi) Putar khawngaihthlakawm deuh ka hmu.

vii) Chhunchaw i ei dawn em?

viii) Khawiah nge in lêng?

ix) He nu thil zuar hi lei rawh.

x) Nang, tlaichaw i ei tawh em?

Table of Contents

[ZIRLAI 26](#)

[THIAMNA LEH HMASAWNNA](#)

[TIH TURTE](#)